



UKA 2020/17/183
30. september 2020

Múte Bourup Egede

Uunga siunnersuut: Sulisoqarnermut akitsuut pillugu Inatsisartut inatsisaata allanngortinneqarnera pillugu Inatsisartut inatsisaat nr. xx af xx. xxx 2020-meersoq. (Erninermi aningaasaateqarfimmik aningaasalersuinissaq il.il.)

(Aningaasaqarnermut Naalakkersuisoq)

Uunga siunnersuut: Naartunermi, erninermi meeravissartaarnermilu sulingiffeqartarnej pillugu Inatsisartut inatsisaat nr. xx, xx. xxx 2020-imeersoq.

(Isumaginninnermut, Ilaqtariinnut Inatsisinillu Atuutsitsinermut Naalakkersuisoq)

Inuit Ataqatigiit upperaata nunatsinni inuit tamarmik pilersitsisinnaassuseqartut inuiaqatigiinnullu tunniussassaqartut. Inuimmi tassaapput nunatta pisuussutai pingaarnerpaat.

Meeqqap naarmiuulerneraniit pingasunik ukioqalernissaata tungaanut, ullumikkorniit malunnaatilimmik annertunerusumik siusissukkut iliuuseqarluni ukkatarinninnissaq piffissanngorsoraarput.

Ullumikkut unammilligassatsinnut kingusinaartuusilluta aqqiviginiartarnerinut nukinnik atuisarnerput siusissukkut iliuuseqarnermik, tassa pinaveersaartitsinermik aallaavilimmik ingerlatsilerutta inuiaqatigiittut unammilligassavut aqqiivigissallugit alloriarfissat oqinnerussaqqooqaat.

Naalakkersuisut inatsisissatut siunnersuutaat marluk, erninermi meeravissartaarnermilu sulingiffeqartarnerup tamanut naligiimmik atuutilernissaanut tunngaviliisussa, kiisami piviusunnulermat Inuit Ataqatigiit nunannaarutigaarput.

Ukiorpassuarnimi maanna eqqartugarput anguniarsimavarput, piviusunnogornissaalu utaqqikatattarsimagipput killiffissiortarsimagippullu malinnaasunit arajutsineqarsimassagunangilaq. Inatsisissami uku qinigaaffiup siuliata naalerneranili naammassineqareersussaani kuugaluarput.

Meeqqat ilaqtariillu inuunermik toqqissisimanartumik aallartinnissaanut aqqutissiuussisinnaasut tamaasa Inuit Ataqatigiit tapersersugaraagut. Ilaqtariinngorlaanummi meeqqamullu toqqissisimaneq inuunerullu pitsaasumik imminullu piffissaqarfigilluarluni aallartinnissaa pingaarluinnartoq ilisimalluarparput.

Inuunerup pitsaasumik aallartinnera, ilaqtariinngorlaanut taamatullu inuiaqatigiinnut siunissamut aningaasaliinertut taaneqarsinnaavoq. Inuunermi naarmiooqqaalernermit toqqissisimanartoq, toqqammavissatut pitsaanerpaajusoq naammattumik uppernarsaatissaqarpoq. Peqqilluni inuunerinnissamut toqqammavissat pingaarnerit ilagilluinnarmagu.

INUIT ATAQATIGIIT

Inatsisartuni



Nunatta pisuussutai pingaernerit, tassa inui kiisalu ilaqtariit nunatsinnik napatitsisuusut inuiaqatigiinnut ima pingaaruteqartigipput, meerartaalerneranni meerartaareernerannilu ulluinik oqilisaassinisaaq avaqqunneqarsinnaanani.

Siunissarpummi pineqarpoq pisussaaffittullu isigisariaqarparput inuiaqatigiit nukittuut pilersinniarneranni meerartatta ilaqtariillu atugaasa ullumerniit pitsaanerunissaata timalimmik anguniartuarnissaa.

Siunnersuutigineqartuni naligiinnerusumik erninermi meeravissartaarnermilu sulingiffeqartarneq aaqqinniarneqarmat, nunatsinni ilaqtariit tamarmik isiginiarneqassasut isumaqarpugut. Meeqqat nunatsinni naligiimmik naarmiuulernermit atugassaat pingaartutut isigigatsigu. Kissaatigaarpullu siunnersuutit ataatsimiitsitaliami suliareqqinneranni tamanna qulakkeerlugu aappasaanerinninnissamut suliarineqassasoq.

Ilanngullugu inassutigaarput nunatsinni erninermi atukkat siammasissumik ataatsimiitsitaliami sammineqassasut. Tassunga ilanngullugu najugarisaaq qimallugu erniartortartut atugaannut pitsanngorsaataasinnaasut sammeqqunaqaat. Najugartimmi qimallugu erniartortartut imaannaanngitsunik ilaanni atugaqartarmata, ilaqtariillu aallartilluarnissaat pingaaruteqaqimmat naalakkersuinikkut apeqqut ukkatarineqartariaqalerpoq.

Qulaani eqqaasatta saniatigut erninermi meeravissartaarnermilu sulingiffeqarnermi ataatanngortut sulingiffeqartarnerannut sinaakkutit pitsanngorsarnissaannik ataatsimiitsitaliap isumaliutissiissusiornissamini samminnissasoq.

Taamak oqaaseqarluta siunnersuut soqutiginarpoq ataatsimiitsitaliami susassaartumi suliarineqassasoq innersuupparput. Tassanilu ilaqtariinnermi politkip tamarmiusup pitsanngorsarlugu nutaamik aaqqiiviginissaanut suleqatigiilluarluni anersaaq sulinermi atorineqassasoq kaammattuutigalugu